



Broj/Број: 02/2-50-1-9-19-12/04
Sarajevo/Сарајево: 21. 06. 2004. godine

Z A P I S N I K

sa 19. sjednice Komisije za vanjsku i trgovinsku politiku Doma naroda Parlamentarne skupštine BiH održane 18. 06. 2004. godine

Devetnaestu sjednicu Komisije za vanjsku i trgovinsku politiku Doma naroda Parlamentarne skupštine Bosne i Hercegovine sazvaо je predsjedavajući Komisije Hasan Čengić.

Sjednici su prisustvovali sljedeći članovi Komisije: Hasan Čengić, Anto Spajić, Vinko Radovanović i Nade Radović, kao i Nevenka Savić, sekretar Komisije. Osman Brka i Velimir Jukić bili su opravdano odsutni.

Osim navedenih, sjednici su, u svojstvu predstavnika predlagača, prisustvovali Mitar Pavić, rukovodilac Odjela iz Ministarstva vanjskih poslova i Vlatka Dangubić, rukovodilac Odjela iz Ministarstva vanjske trgovine i ekonomskih odnosa.

Sjednicom je predsjedavaо predsjedavajući Komisije Hasan Čengić. Nakon što je konstatirao da postoji kvorum, predsjedavajući Komisije je predložio Dnevni red:

DNEVNI RED

1. Usvajanje Zapisnika sa 18. sjednice Komisije;
2. Saglasnost za ratifikaciju Sporazuma između Vijeća ministara Bosne i Hercegovine i Vlade Sjedinjenih Američkih Država o zaštiti i očuvanju određene kulturne svojine - predlagač Predsjedništvo BiH;
3. Saglasnost za ratifikaciju Sporazuma između Vijeća ministara Bosne i Hercegovine i Republike Albanije o ukidanju viza za nosioce diplomatskih i službenih pasoša - predlagač Predsjedništvo BiH;
4. Saglasnost za ratifikaciju Sporazuma između Bosne i Hercegovine i Republike Albanije o slobodnoj trgovini - predlagač Predsjedništvo BiH;
5. Saglasnost za ratifikaciju Sporazuma između Bosne i Hercegovine i Republike Rumunije o slobodnoj trgovini - predlagač Predsjedništvo BiH;

6. Saglasnost za ratifikaciju Sporazuma između Vijeća ministara Bosne i Hercegovine i Savjeta ministara Srbije i Crne Gore o uslovima putovanja državljana dvije države - predlagač Predsjedništvo BiH;
7. Saglasnost za ratifikaciju Evropske konvencije o prekograničnoj televiziji (ETS 132), otvorena za potpisivanje 5. maja 1989. godine u Strazburu, sa Protokolom o izmjenama Evropske konvencije o prekograničnoj televiziji, otvorenim za prihvatanje 1. oktobra 1998. godine - predlagač Predsjedništvo BiH;
8. Tekuća pitanja.

Dnevni red je jednoglasno usvojen.

Ad. 1. Usvajanje Zapisnika sa 18. sjednice Komisije

Zapisnik sa 18. sjednice Komisije je jednoglasno usvojen.

Ad. 2. Saglasnost za ratifikaciju Sporazuma između Vijeća ministara Bosne i Hercegovine i Vlade Sjedinjenih Američkih Država o zaštiti i očuvanju određene kulturne svojine - predlagač Predsjedništvo BiH

U svojstvu predstavnika predlagača, o Sporazumu je govorio g. Mitar Pavić. On je objasnio da se radi o okvirnom Sporazumu, koji može poslužiti kao osnova za konkretne programe i projekte iz ove oblasti, podstaći kontakte i doprinijeti ukupnoj saradnji dvije zemlje.

Članovi Komisije su jednoglasno odlučili da predlože Domu naroda Parlamentarne skupštine BiH da donese odluku o davanju saglasnosti za ratifikaciju Sporazuma.

Ad. 3. Saglasnost za ratifikaciju Sporazuma između Vijeća ministara Bosne i Hercegovine i Republike Albanije o ukidanju viza za nosioce diplomatskih i službenih pasoša - predlagač Predsjedništvo BiH

U svojstvu predstavnika predlagača, o Sporazumu je govorio g. Mitar Pavić. On je rekao da se radi o jednom od tipskih bilateralnih sporazuma koje je Bosna i Hercegovina već potpisala ili su u pripremi, a kojima je cilj da se olakšaju kontakti zvaničnika dvije zemlje, a tim putem i unaprijedi saradnja, u ovom slučaju, sa Republikom Albanijom.

Članovi Komisije su jednoglasno odlučili da predlože Domu naroda Parlamentarne skupštine BiH da donese odluku o davanju saglasnosti za ratifikaciju Sporazuma.

Ad. 4. Saglasnost za ratifikaciju Sporazuma između Bosne i Hercegovine i Republike Albanije o slobodnoj trgovini - predlagač Predsjedništvo BiH

U svojstvu predstavnika predlagača, o Sporazumu je govorila gospođa Vlatka Dangubić. Objasnila je da se radi o jednom od bilateralnih sporazuma o slobodnoj trgovini koje su sve zemlje regiona jugoistočne Evrope u obavezi da potpišu po osnovu potpisivanja Memoranduma o razumjevanju Pakta stabilnosti. U diskusiji koja je vođena nakon toga, zaključeno je da Sporazum ne može imati negativne posljedice po domaće proizvođače.

Nakon toga, članovi Komisije su jednoglasno odlučili da predlože Domu naroda Parlamentarne skupštine BiH da donese odluku o davanju saglasnosti za ratifikaciju Sporazuma.

Ad. 5. Saglasnost za ratifikaciju Sporazuma između Bosne i Hercegovine i Republike Rumunije o slobodnoj trgovini - predlagač Predsjedništvo BiH

O samom Sporazumu, kao i o trgovinskim odnosima i nivou robne razmjene sa Rumunijom, govorila je gospođa Vlatka Dangubić, u svojstvu predstavnika predlagača. S obzirom na činjenicu da Rumunija nije značajan vanjsko-trgovinski partner Bosni i Hercegovini, te da zato neće moći biti ni negativnih efekata za bh privredu, a postoji obaveza da se sporazum potpiše, članovi Komisije su jednoglasno odlučili da predlože Domu naroda Parlamentarne skupštine BiH da donese odluku o davanju saglasnosti za ratifikaciju Sporazuma.

Ad. 6. Saglasnost za ratifikaciju Sporazuma između Vijeća ministara Bosne i Hercegovine i Savjeta ministara Srbije i Crne Gore o uslovima putovanja državljana dvije države - predlagač Predsjedništvo BiH

U svojstvu predstavnika predlagača, o Sporazumu je govorio g. Mitar Pavić. Članovi Komisije su pozdravili potpisivanje Sporazuma, ali su tražili od predstavnika predlagača tumačenje Sporazuma u odnosu na lične dokumente koje izdaje UNMIK na Kosovu. U tom smislu, predstavnik predlagača je zamoljen da na sjednicu Doma naroda, na kojoj će se konačno odlučivati o saglasnosti za ratifikaciju, dođe sa zvaničnim stavom po ovom pitanju.

Nakon toga, članovi Komisije su jednoglasno odlučili da predlože Domu naroda Parlamentarne skupštine BiH da donese odluku o davanju saglasnosti za ratifikaciju ovog Sporazuma.

Ad. 7. Saglasnost za ratifikaciju Evropske konvencije o prekograničnoj televiziji (ETS 132), otvorena za potpisivanje 5. maja 1989. godine u Strazburu, sa Protokolom o izmjenama Evropske konvencije o prekograničnoj televiziji, otvorenim za prihvatanje 1. oktobra 1998. godine - predlagač Predsjedništvo BiH

Predsjedavajući Komisije je konstatirao da nije prisutan predstavnik predlagača, iako je uredno obavješten. Zbog toga su članovi Komisije jednoglasno odlučili da odgode raspravu o ovoj Konvenciji. Zaključeno je da se uputi dopis predlagaču kojim će biti obavješten o ovoj situaciji i upozoren da će se u slučaju da ne bude prisutan ni na sljedećoj sjednici, smatrati da je odustao od prijedloga.

Ad. 8. Tekuća pitanja

Rasprava nije vođena.

Predsjedavajući Komisije

Hasan Čengić